

յին արտադրանքի հետ և շատ արագ տեղի տվեց նրա առջև: Եվ վաղուց արդեն մոռացված է այն ժամանակը, երբ ամեն օջախ իր տանն ունենում էր անպատճառ դազգան և ինքն իր գերդաստանի անդամների համար գործում պինդ-¹²⁵րակից՝ բամբակից կտավը՝ հալովի, փոխանի և այլ նպատակների համար, պնօրից՝ շալը—շովխայի, շալվարի, կօտու համար, ապրեշումից՝ կնկա կօտի, շաքսավ կամ շարդաթ: Արդեն XIX դ. վերջերում տնայնագործության այս ճյուղը ցուցաբերում էր իր մահացման նշանները: Նա աշխուժանում էր միայն այն ժամանակները, երբ կտրվում էր կապը գործարանների հետ և գործարանային ապրանքների սուր պակասություն էր լինում որևէ պատճառով, այսպես, օրինակ՝ համաշխարհային առաջին պատերազմի և քաղաքացիական կոիվների ժամանակ: Կամ երբ ապրանքների գները շատ էին բարձրանում, օրինակ՝ երկրորդ համաշխարհային պատերազմի ժամանակ: Ոստայնակության երկու ճյուղերից—տափի կօրծից և ճրկավրի՝ կօրծից, ալելի կենսունակություն և համառություն է ցուցաբերում առաջինն իր պարզ տեխնիկայով և նախնական սարքավորումով և այնպիսի կենցաղային կարևոր իրերի արտադրությամբ, որոնք գործարանային արդյունաբերության առարկա դարձած չեն, սակայն չափազանց պահանջելի են տեղական պայմաններում:

Տափի կօրծը պահել է հիմնականում շատ հին ժամանակներից ժառանգած տեխնիկան, որին պատահում ենք օրինակ դեռ հին Եգիպտոսում, որտեղ սակայն աշխատանքը կատարվում էր երկու մարդու մասնակցությամբ՝ մեկը ձգած թելերի շարքերը բարձրացնում իջեցնում էր, մյուսը նրանց միջով անց էր կացնում խաշաձևվող թելերն ու սեղմ իրար թխում՝ կպցնում, ամրացնում: Այդ նախնական եղանակի հետ համեմատած Զանգեզուրում տարածվածն անհամեմատ ալելի կատարելագործված էր՝ այստեղ մտել էր և ասպր և ասպր պահող էշի վօ(ր)նդիկները¹²⁶ էշի ոտները և աշխատում էր տափին՝ գետնին նստած մեկ մարդ—միշտ կին: Իր ձեռքի քորի՝ թուրի օգնությամբ նա հմուտ շարժումներով բարձրացնում էր ճեմֆի մերթ զույգ, մերթ կենտ թելերի շարքը, անցկացնում աջից ձախ, ձախից աջ թելի կծիկն ու քորավ թխում՝ իրար իմուր կպցնում:

Այսպես գործում էին տօղաղաթին, կնկա ֆողը, ձիու և էշի փորի կապերը, ջեշիմը, երբեմն և մարդու շավարացուն: Էշի վօ(ր)նդիկները երբեմն փոխարինվում էին ծալովի եռոտանիով, որի երեք ձողերն իրար հետ զլխներով կապված են և հարկ եղած ժամանակ կարող են միասին հավաքվել և ծալվել: Այս եռոտանին կարելի էր հեշտ բարձել ձիու, ջորու կամ էշի վրա և տեղափոխել: Աղբրեջանական կանաչք գերադասում էին այդ եռոտանիով աշխատել, մանավանդ սարում: Տափի կօրծը քորֆերի՝ թուրքերի մեջ առանձնապես շատ տարածված էր և զարգացած:

Ճրկավրի կօրծը պահանջում էր բավականին բարդ կազմվածք: Դազգանը կանգնեցվում էր հորի վրա, որից և ստացել էր իր իսկական, սկզբնական անունը՝ ճրկափոր, կամ՝ գավառաբարբառի մեջ գործածված ճրկավր, ճրկափոր: Այս բառի մեջ մտնող առաջին բաղադրիչ ճրկի արմատը՝ ջուհակ բառի կրճատ ձևը Զանգեզուրում առանձին չի գործածվում: Դազգանը դրվում է դառաղամի մի դրաղ՝ անկյուն տեղում, կրկան մի կուճուր հեթք կա ճրկավրի բուշին՝ գլխին մի փոքր յերթիկ կա ճրկափորի ուղղությամբ: Հորը թույլ էր տա-

¹²⁵ Բեխում՝ պեմբնի:

¹²⁶ Բեխում՝ վրեմները: